

四庫全書

子部

欽定四庫全書

子部

文昌雜錄卷四至

大

詳校官中書臣徐志晉

員外郎臣牛稔文覆勘

總校官檢討臣何思鈞

校對官助教臣汪錫翹

謄錄監生臣保英

欽定四庫全書

文昌雜錄卷四

宋 龐元英 撰

四月六日北遼賀同天節使副見望參官起居是日微雨特放唯引對北遼使者於紫宸殿酒五行罷

戶部王員外言昔年作一夢甚奇一布榜大書云七元均氣丁丑人作相後數年今右僕射蔡公拜公丁丑生實契此夢乃知宰相固有默定如紗籠中人之類前書

所記者甚多也

國子朱司業言南方柑橘雖多然亦畏霜每霜時亦不甚收唯洞庭霜雖多即無所損詢彼人云洞庭四面皆水也水氣上騰尤能闢霜所以洞庭柑橘最佳歲收不耗正為此爾

元英昔隨侍太源見是年秋解進士正額外續解李霖朝廷以故相曾有此比令禮部收試既而正額所送多省下榜出有霖姓名遂及第今為朝奉大夫及至育州

秋試進士已鎖院今太府寺丞王璋以病在道久八月
半方到州牒試院亦令收試文在優等解送甚高明年
登科而歸信有命也

庫部林郎中說建州上春採茶時茶園人無數擊鼓聞
數十里然亦園中才間壟茶品高下已相遠又況山園
之異邪太府賈少卿云昔為福建轉運使五月中朝旨
令上供龍茶數百斤已過時不復有此新芽有一老匠
言但如數買小銚入湯煮研二萬權以龍腦水灑之亦

可就遂依此製造既成頗如歲進者是年南郊大禮多分賜宗室近臣然稍減常價猶足為精品也

倉部韓郎中云叔父魏國公喜飲酒至數十大觴猶未醉不甚喜茶無精麤共置一籠每盡即取碾亦不問新舊嘗暑月曝茶於庭中見一小角上題襄字蔡端明所寄也因取以歸員王家白後見蔡說當時祇有九銖又以菜園一餅充十數以獻魏公其難得如此

司門范郎中云叔父蜀郡公鎮近居許昌作高庵以待

司馬公累招未至庵極高在一臺基上司馬公居洛作地室隧而入以避暑熱故蜀郡作高庵以為戲也北京留守王宣徽洛中園宅尤勝中堂七間上起高樓更為華侈司馬公在陋巷所居才能庇風雨又作地室常讀書於其中洛人戲云王家鑽天司馬家入地然而道德之尊彼亦不知顏氏子之樂也

工部王侍郎云昨謫守單州後圃有宓子賤琴臺為一郡之勝獨此可以銷憂耳有詩云琴聲久逐秋雲去臺

勢空隨古堞高既召還見於垂拱殿與呂資政同班殿廬因話琴臺後數日呂遂知單州甚可異也

祠部每歲祠祭大祠三十正月上辛祈穀上帝四月雩祀上帝九月明堂祀上帝冬至祭昊天上帝夏至祭皇地祇孟春孟夏孟秋孟冬臘五享太廟正月上辛祀感生帝立春祀青帝立夏祀赤帝立秋祀白帝立冬祀黑帝土王祀黃帝春分祀高禪春分朝日仲春仲秋臘祭太稷仲春仲秋祀九宮貴神孟冬祭神州地祇秋分夕

月臘蜡百神立春祭東太一宮立夏立冬祭中太一宮
立秋祭西太一宮中祠十有四立春後亥祭先農立春
後丑祀風師仲春祀五龍季春享先蠶立夏後申祀雨
師雷師四立井土王祭嶽鎮海瀆仲春秋上戊釋奠
武成王小祠十有三立冬後亥祭司中司命司民司祿
秋分享壽星立秋後辰祀靈星孟冬祭司寒仲春祭馬
祖仲夏享先牧仲秋祭馬社仲冬祭馬步立春祭尹司
命立夏祭竈季夏土王祭中雷立秋祭門及厲立冬祭

行皆有司行事焉

元英昨充元豐五年賀正旦國信使行至神水驛
苦風眩昏亂不記省隨行小史輩皆環坐以泣通一昔
方稍安是年正旦接伴使杜刑部紘至深澤縣界中浴
幾不可救劉右司摯充賀同天節接伴使汭路病傷寒
至滑州增劇然艾數百肩輿以歸後累月方安一歲中
奉使者皆得疾危甚殊可怪也

禮部尚書黃公說丙申年秋試進士至八千人國朝以

來未有如此之盛他試院不能容始命就開寶寺分數場引試開寶為試院自此始禮部林郎中以清微之風養萬物賦為第一人始可謂雄魁也

元豐三年高麗國遣使柳洪副朴寅亮朝貢且獻日本國車一乘洪云諸侯不貢車服誠知非禮本國所以上進者欲中朝見日本工拙爾朝廷為留之高麗本箕子之國其知禮如此

戶部劉郎中說雄州城南陂塘數十里芰荷極望以小

舫遊其間鷗鷺往來紅香泛於樽俎雖江鄉亦無此景
四時有蟹暑月亦甚肥昔見謝通議言曾通判莫州有
戎卒溺塘水死州請覆驗既到彼尸不可得所司云水
中積蟹一害莫知淺深尸在其下無由得也雄莫間蟹
多如此

右司郎中劉摯罷以提點開封府界諸縣公事楊景略
為右司郎中以知壽州葉溫叟為都官員外郎以提舉
荆湖北路常平倉李萃為屯田員外郎

禮部尚書恩賜今年龍茶一斤折簡諭林郎中云欲以五餅分送郎官如何林獻答云衆官參詳委得允當遂以分送五廳他則不然也

元豐五年五月官制始行兩省官但除給事中中書舍人起居郎起居舍人而已六年四月方以監察御史王桓為右正言

五月一日文德殿視朝仗衛如式是日對于闐國進奉使貢物充廷多白玉熙寧六年大食俞廬和地國亦貢

雲霞白玉圭一副今藏內帑

詳定禮文所上言臘蜡百神四方並就南郊一壇禮未
合古請蜡祭四郊各為一壇東方日西方月各神農配
作大祀南方神農為神主后稷配北方亦神農為神主
后稷配係中祠其五官五田峻五星二十八宿十二辰
五嶽四鎮四海四瀆每方山川水澤丘陵墳衍原隰井
泉水墉坊郵畷青龍朱雀騏驎白虎玄武於菟鱗羽介
毛羸猫昆虫並如故事若其方有災害則闕而不祭詔

可

國子司業朱服上言惟先王之時燕飲必有射將祭擇士於射宮能偶則又別之以射射武事也先王於進成人材之際每不廢焉今養士之盛莫盛於大學而大學之士鮮能知射竭見武學教場與國子監相去數十步欲使太學諸生遇假有願射者聽往習焉不惟閒暇之時使游於藝又足以收其放心而不遷於異物狀下禮郎羣官皆以為然上都省乞如所請云

元豐四年高麗國遣使崔思齊副李子威朝貢并獻樂器明年正月十四日車駕幸集禧觀詔思齊等侍從又令所遣樂工對御獻樂賜袍帶銀帛有差思齊言今高麗樂是新羅樂樂器有嘉配琴謂笛為大吟舞有七十餘種止用兩人謂之攀花云

勅大忌日六曹諸司並不作假執政官早出官司不得隨出前此車駕遊幸及臨奠宗室若大臣咸為之舉哀及後苑觀麥觀稻觀穀觀橙及延和殿北遼禮物崇政

殿疎決景靈宮朝謁壯使見辭執政禮上皆早出故有是勅

資州上言資陽縣民支漸葬母於賴錫山漢中廬於墓側已經三年自負土成墳布素不食五味惟菽粟而已日三時號慟餘時即誦佛經有白黑雀各一對盤泊墳上松間每有野狸白蛇兔自山上來看上土久之方去又有白鷗及五色雀計萬餘圍繞乞行旌賞勅特賜粟

帛

熙寧中福建賊廖恩聚羣黨於山林招撫久之方出降朝廷赦其罪授右班殿直既至有司供脚色一項云歷任以來並無公私過犯見者無不笑之

祥符中開寶寺福勝院舍利塔上光明或似水晶或似金色於相輪上或隱或顯又降下舍利於地面磚石上約五千餘粒僧俗虔心求覓必獲霑足直宗幸塔下焚香有舍利見大如拳色如水晶召從臣同觀洎賜食退舍利復見於西北鈴索上往來飛動臣庶莫不瞻覩今

慶壽崇因閣慈聖光獻太皇太后所建即其地也

閣門舊儀大宴更衣降坐羣臣退再坐羣臣先升殿既就坐御羣臣謝花拜於坐次天禧中司諫祖士衡上言欲望每更衣再坐有司引羣臣班於殿廷俟升御坐謝花於廷乃分引上殿自此始也

禮部王員外說昔有一舉子恩澤榜授三班借職作歇後詩詩云官資得箇三班借請給全勝錄事參從此罷稱鄉貢進這回走馬東西南唐宰相鄭榮好作歇後句

此詩亦甚工也

元豐三年高麗國王王徽以疾表乞太醫朝廷遣閣門
通事舍人王舜封押至彼國舜封上言十二月一日徽
生辰北遼遣起居郎知制誥馬堯俊充使留仙賓館堯
俊獻徽詩云始從鉤裂海東天世世英雄稟自然掌上寶
符鈐造化胷中神劍畫山川太宗莫取龍州道煬帝難
乘鴨綠船真是金輪長理國宜論八萬四千年徽以錦
紬八百匹為謝云

給事中徐禧沒於王事朝廷錄其子弟十餘人以弟祕
為太廟齋郎秘自陳願閣此恩以待兄有嫡孫長日推
授朝廷嘉而許之秘為太學生有聲名而孝悌廉退之
行又如此

開寶六年翰林學士李昉知貢舉放進士及諸科及第者
凡三十八人下第進士徐士廉自陳屈抑即詔貢部以
八等第進士并終經學人並親覆於殿廷內出未明求
衣爵待士詩進士宋準等一百二十七人並放及第昉

所放還落者十人責授昉太常少卿御試舉人自此始也

淳化中有司言油衣帟幕損弊者萬數欲毀棄詔令煮而浣之命尚方染以雜色刺為旗幟焉

元豐元年詳定禮文所言古者祀天於地上圓丘在國之南祭地於澤中之方丘在國之北其牲幣器色歌詩奏樂亦皆不同凡以順陰陽因高下而事之以其類也漢元始間以祀樂既各有合而禮又有夫婦共牢之文

於是合祭天地以隆一體之義後漢魏晉及唐以來皆因仍之本朝親祀上帝即設皇地祇位稽之典禮有所未合勅詳定更改禮文聞奏陳襄議曰漢元始中姦臣妄議不原經意附會周官大合樂之說謂當合祭於帝從而用之故天地共犢禮之失自此始矣臣以謂既罷合祭則南北二郊自當別祀伏請每遇親祠之歲先以夏日祭地祇於方丘然後以冬至祀昊天於圓邱李清臣議曰欲乞每遇親郊七日戒之後三日宿之時宿

太廟以告宿北郊以祭宿南郊以祀所以先太廟者告祖為配也所以先北郊者先卑後尊也然雖自北郊至南郊相去為遠則中道不可以無舍請為帷宮止而後進王存議曰國家用冬夏至遣官攝事於二郊蓋周禮未嘗廢也其三年一有事於南郊實同漢制若因三歲之期漸輟郊丘之祀間有事於北郊如先朝親耕祫享之比則不失恭事天地之意陸佃議曰今或冬至至親祠昊天上帝因即圓邱之北別祠地祇不崇朝而天地

之祠畢舉矣張璪議曰竊謂陽生於十一月陰生五月則陰陽之生天地致用之始故天神地祇可得而禮然當今萬乘儀衛加倍於古方盛夏之時不可以躬行臣以謂宜即郊祀之歲於夏至之日盛禮容具樂舞遣冢宰攝事雖未能皆當於禮庶幾先王之遺意猶有存焉初如璪議其親祠南郊罷皇地祇并從祀位六年五月二十八日夏至適當親祀之歲於是左相王公攝事禮部黃尚書太常李少卿為亞終獻中書蔡舍人讀冊文

且用備樂愚以謂祠官當給本品鹵簿方可為盛禮容也

禮部黃尚書上言伏覩覆定臣寮諡議具法質明入內廢務一日假故既頻事易停壅欲乞自今集官覆諡午刻入省勅依乃罷酒食故事尚書省集請諡之家自設醪饌舊從官給今方罷之

吏部頒給印歷六曹尚書侍郎左右僕射左右丞批都司郎官左右丞批二十四司郎中員外本曹尚書侍郎

批以書遂考功過焉

六月二日三省官集於吏部寓治都廳講求奉上仁宗
皇帝英宗皇帝徽號初四日兩省官與尚書省左右司
郎已上又赴門下中書都堂再議執政官在中設羣官
位重行皆北向焉

晉志云袴褶之制未詳所起近代車駕親戎中外戒嚴
則服之唐制三品以上紫褶五品已上緋褶通用細綾
七品已上綠褶九品已上碧褶通用小綾玉藻云禪為

紵

音角

引急也。帛為褶，今袷也。鄭云：單為紵，有衣裳而無裏。

者也。帛為褶，有表裏而無著者也。周遷輿服雜事云：趙武靈王，縵胡之纓，戎服有袴褶之制。始有漢武近世服，以從戎。隋制，纁嚴文武百官，咸服之。車駕親戎，則縛袴，使不舒散。皇朝，導駕官袴褶蓋馬上之服也。

太子太師張公昇，大中祥符八年歲在乙卯，登科。熙寧九年丙辰，終於許州陽翟縣里。公起布衣，致使相，自初仕至薨，謝歷一甲子，近世所無也。

真宗皇帝東封還次太平驛賜從臣辟寒丸仁宗每崇政殿親試進士亦賜大臣七寶茶至今以為故事

以禮部尚書黃履為御史中丞

詳定禮文所言謹按儀禮曰夫婦一體故昏禮則同牢而食合卺而飲終則同穴祭則同几同祝同饌明夫婦一體未有異廟者也恭惟孝惠皇后太祖皇帝元妃淑德皇后太宗皇帝元妃章懷皇后真宗皇帝元妃而孝章皇后實太祖皇帝繼后當時議者或以其未嘗正位

中宮或以其繼而不許其配有司因循不究其實皆祭以別廟在禮未安伏請升祔太廟以時配享勅恭依仍於今年大禮前更不行孟冬薦享止俟升祔禮畢遍享太廟并祭七祀配享功臣其太廟祔室三省看詳合以配繼先後為序云

以太常少卿李常為禮部侍郎以司勳郎中葉均為秘書少監以戶部員外郎黃好謙為司勳員外郎以提點開封府界常平倉張詢為戶部員外郎

通典梁御史中丞給威儀十人其八人武冠降鞬一人
緋衣執鞭杖依行列行七人唱呼入殿引音至階一
人執青儀囊不啻國朝故事御史中丞告官呵引至朝
堂門兩朱衣吏告引入朝堂至文德殿門止蓋亦引音
之比也

長安隱士曰高繹有古人絕行慶厯中召至京師朝廷
欲命以官固辭歸山特賜安素處士家甚貧妻子寒餒
終不以困故受鄉人財閉門讀書而已昔王霸憐其子

蓬髮投耒愧卧不起前賢之所難而處士蹈之有餘裕也嘗見古老說种放隱終南山召拜起居舍人賜告西歸有一高士隱居三世以野菽一盤詩一篇贈放云接得山人號舍人朱衣前引到蓬門莫嫌野菜無多味我是三追處士孫放國史有傳若夫志意修則驕富貴道義重則輕王公惟安素可以無慙矣

舊三司使廳屏風崔白畫蘆雁用意極工昨為僕丞都堂此屏在後閣及遷都省左僕射命移於尚書令廳後

亦近世之奇筆也

閏六月以新差權知曹州并亮采為戶部員外郎

二十四日尚書令廳集三省官上仁宗皇帝英宗皇帝
徽號奏議羣官雜壓非故事也愚以謂左僕射當坐東
偏南向門下侍郎次之左省官列於東北壁下重行南
向右僕射坐西偏南向中書侍郎次之右省官於西北
壁下重行南向左丞東相對如學士太常卿皆赴即坐
於正南北向雖未必盡合舊儀猶愈於雜壓也

七月十二日后升祔於太廟兵部黃麾仗太常鼓吹一千八百餘人重翟車四乘是日五鼓神主自后廟升綵殿宗室正任已上步導進行直南汭城入太廟至南神門外降絳殿入幄升腰輿各祔本室太祖室曰孝惠次孝明次孝章太宗室曰淑德次懿德次明德次元德真宗室曰章懷次章穆次章獻次章懿既升祔行遍享之禮雍王曹王濮陽郡王充三獻禮畢百官詣東上閣門奉表稱賀

以戶部尚書安燾為司知樞密院事以吏部侍郎李承之為戶部尚書以戶部侍郎陳安石為吏部侍郎以河
北都轉運使蹇周輔為戶部侍郎以左司郎中吳雍為
直龍圖閣河北轉運使以吏部員外郎曾伉為左司員
外郎又以司勳員外郎黃好謙為郎中以戶部員外郎
井亮采為金部員外郎

唐德宗正元十年七月賜故唐安公主諡莊穆蓋公主
賜諡始於此也

韓文公永正行云公然白日受賄賂火齊磊落堆金盤
南史中天竺國說火齊狀如雲母色如紫金有光輝別
之則如蟬翼積之則如紗縠之重沓又王子年拾遺記
曰董偃嘗卧延清之室上設火齊屏風所謂磊落者亦
珠琲之謂也

二十五日文武百官詣太廟奏請上仁宗徽宗號曰體
大法道極功全德神文聖武濬哲明孝皇帝左相行事
起居郎蔡京著作郎豐稷讀祝其祝言皇帝謹遣百官

奏請徽號之意云

二十八日詔門下升祔禮畢宜覃慶澤以暨後昆四后之家各與最長者初等官已仕者改一官

乾德五年正月十六日詔以朝廷無事年穀屢豐上元觀燈可更增十七十八日兩夜自後每至十六日開封府以舊例奏聞皆詔更放兩夕雍熙二年十月下元節張燈賜近臣宴於樞密使王顯私第夜分命中使賜御製詩一章其後每燈夕皆命中書樞密分往大寺焚香

就賜御筵遂為故事自此始也

杜甫紫宸退朝詩云香飄合殿春風轉花覆千官淑景移又晚出左掖云退朝花底散歸院柳邊迷乃知唐朝殿亦種花柳今殿庭唯對植槐楸鬱鬱然有嚴毅之氣也

八月左丞蒲宗孟罷出知汝州以右丞王安禮為左丞以吏部尚書李清臣為右丞以端明殿學士知蘄州曾孝寬為吏部尚書以都官員外郎葉溫叟為郎中

禮部李侍郎說秘書少監孫莘老莊居在高郵新開湖
邊嘗一夕陰晦莊客報湖中珠見與數同人行小草徑
中至水際見微有光彩俄而光明如月陰霧中人面相
覩忽見蚌蛤如蘆蓆大一殼浮水上一殼如張帆狀其
疾如風舟子飛小艇競逐之終不可及既遠乃沒

九月以吏部郎中呂嘉問為光祿卿以司勳郎中黃好
謙知揚州是月都官員外郎許安世以憂去官

皇祐二年大享明堂仁宗謂輔臣曰前代禮神有祭玉

燭玉二品今獨燭玉無乃闕禮文邪輔臣等對曰唐大和中太常卿王起以當時祀事止有燭玉而無禮神美玉請下有司造蒼璧等七玉祭訖藏之燭玉即用珉唐末以來祀典廢闕禮神之玉不復備用以至於今勅其令有司議如典禮是時適回紇貢玉璞數十剖之命匠者制為蒼璧黃琮四圭有邸青圭赤璋白琥黝璜尤溫粹祭玉之備始復於此

十月以右司郎中楊景略為起居郎以錢總為左司郎

中以孫覽為右司員外郎又以大理卿楊汲為刑部侍郎

十一月十二日大慶殿遣上仁宗皇帝英宗皇帝玉冊玉寶上服絳紗袍再拜廷中跪授冊寶使既出大慶門禮儀使奏禮畢上猶立廷中冊寶升輅既遠從官方前導歸御幄云

十五日遷寓治禮部入新省自尚書令列曹員外郎廳屏風皆書周官一篇在位何以稱上所以戒責之意邪

南郊大駕上乘舊玉輅戶部王員外說輅上有款識唐高宗顯慶年造高宗麟德三年玄宗開元十三年真宗皇帝祥符元年封禪此輅凡三至泰山開元十一年祥符四年亦兩至濰上真所謂萬乘之器也

司封員外郎王祖道出知汀州以禮部員外郎王子韶為庫部員外郎以太常博士何洵直為禮部員外郎以駕部郎中吳安持為太府少卿以柯述為司封郎中以蘇注為司勳員外郎以王兢為倉部員外郎以蒲宗閔

為都官郎中

十九日車駕詣萬壽觀恭謝畢由天波門幸尚書新省
至令僕廳遂徧至六曹傳宣尚書侍郎郎中員外郎各
轉一官主事已下等第支賜凡二萬緡至禮部上顧謂
侍郎李常曰唐尚書省亦止於四千楹又問吏額多少
常具以對又宣諭云朝廷待遇責任之意非輕卿等各
宜自勉雖千載難逢之期願羣臣何以上報聖恩邪
十二月一日文德殿視朝仗衛如式是日大風詔移御

紫宸殿百官起居正如唐喚仗入閣之儀也

右省趙諫議說王汾學士皆言夢中見人云君要如意須逢元公了不曉所謂後數年得知兗州其字即元公方悟前夢之可信也

二十八日以魯國大長公主薨輟朝五日是日北遼賀正旦使副見於崇政殿賜茶而已上御靴袍自延和乘輦至崇政非後殿常儀也

文昌雜錄卷四

欽定四庫全書

文昌雜錄卷五

宋 龐元英 撰

元豐甲子正月五日宴北遼國信使於紫宸殿酒七行
不作樂以魯國大長公主在殯故也是時上元節有司
已設山樓詔撤之罷御端闈魯國仁皇帝之女恩禮加
隆焉

熙寧二年朝廷始命兩浙福建等路轉運司招接高麗

入貢時舟人傳旋至彼國述朝廷之意王徽喜甚次年
二月十五日然燈如中華上元旋適在彼見徽賦感天
朝招接擬侍中華然燈夜述懷詩云宿罪應深近契丹
歷年徒貢事多般忽蒙舜日龍綸召便侍堯天佛會觀
燈艷似蓮裝闕燭月華如水洩雲寒夷身幸入華胥境
甚惜今宵漏滴殘福建路轉運使張徽上其事云

以開封府推官祖無頗為駕部郎中以開封府判官胡
宗愈為吏部郎中又以司勳員外郎蘇注為郎中二月

五日太師致仕文公自西京造朝修謝對於垂拱詔是日特開宴酒五行命御藥院內侍梁從政持以大觴酌御樽酒以賜之且命飲侍臣拭目以觀恩禮之隆遇馬慈聖光獻太皇太后天聖中冊為皇后其文丞相呂公夷簡之辭元豐二年奉上尊諡詔同知樞密院事呂公著撰冊文丞相之子也樞密公亦自陳遭遇中外莫不感異云

滕正議甫知安州苦風眩久不差有一道人贈藥方名

筠遇丹因修合服之舊恙頓愈自此遂常服既罷官赴闕至都城久之未有除授因旦服筠遇丹謂其門人云久服此藥豈非得筠州邪不數日遂知筠州禮部何員外正議子壻也質之信然

三月二日太師潞公西歸詔宰相執政官三省近臣學士待制宴餞於瓊林院賜御詩以寵行前此令有司不得收河東印節又令都水具舟由洛河以歸清明日特宴於玉津園唯執政官得預太師以詩述感遇之意以

遺丞相次日賜御詩俯同元韻恩數之隆蓋如此公卿
聳羨云

十八日集英殿大宴再坐延安郡王侍立百官稱賀廷
中既升殿上遣內侍引王揖宰相輔臣皆再拜以謝酒
再行方還內在位瞻覩莫不悅懌并蹈共醕賜觴焉

四月初五日禮部試饒州童子朱天錫年十一念周易
尚書毛詩周禮禮記論語孟子凡七經各五道皆全通
無一字少誤者是日禮部侍郎召本曹郎官赴坐左右

觀者數百人此童諷誦自若畧無懾懼後數日召至睿
思殿賜五經出身昔晏元獻公名貫撫州近年何正臣
名占臨江皆童子舉江南多奇偉亦山川之秀使然耶
以陝西轉運副使范純粹為左司員外郎補曾伋致仕
闕又以倉部員外郎王兢為郎中以湖南轉運判官鄒
極為度支員外郎以司門郎中范百祿為吏部郎中以
太常丞呂升卿為司門員外郎

杜甫為左拾遺作紫宸殿退朝詩云宮中每出歸東省

會送夔龍集鳳池東省門下也鸞臺在馬鳳池在中書省杜詩不應有誤恐唐朝別有故事又恐是時政事堂適在右省耳

五月戶部尚書李承之以憂去官以龍圖閣直學士知開封府王存為兵部尚書尋改戶部以戶部侍郎蹇周輔為寶文閣待制知開封以刑部侍郎楊汲為戶部侍郎

景靈宮天元殿考宮之初靈芝產於殿栱今歲孟夏朝

獻車駕詣宮前數日芝又產於殿門近臣賀於齋殿右僕射賦詩命禮曹郎官屬和焉

登聞鼓院未知起於何代因讀唐會要見顯慶五年有抱屈人齋鼓於朝堂訴遂令東西都各置登聞鼓自此始也

六月吏部侍郎蘇頌以憂去官以知桂州熊本為吏部侍郎以庫部員外郎王子韶為考功員外郎以路昌衡為右司員外郎以左司員外郎范純粹為河東轉運使

以工部郎中范子奇為左司郎中

禮部上言郊廟親祠儀注祭日皇帝並服靴袍至大次於禮意未協謹按禮記郊特牲曰祭之日王皮弁以聽祭報報謂小宗伯告時告備若今請中嚴奏外辨也韋彤五禮精義以通天冠猶古之皮弁齋服也伏請太廟圓正祭之日服通天冠絳紗袍自齋殿赴大次以應皮弁以聽祭報之儀勅依

新制寺監丞簿皆輪宿直長貳每五日一點宿有一卿

長每點宿亦令丞簿自依日赴直謂長貳點宿乃點檢之義按學士舍人新拜官有僦直舊官間數日乃點檢直欲新來者稍休也豈點檢之謂邪士大夫不可以不知故事一點字其誤如此

書奏之奏謂進也漢田蚡奢侈後房婦女以百數諸奏珍物狗馬玩好不可勝數注奏進也

晉州州學教授陸長愈上言朝廷追封孟軻為鄒國公竊謂春秋釋奠宜與顏子並配文宣王禮部看詳孟子於

孔聖之門堂在顏子之列伏請自今春釋奠以鄉國公孟子配食文宣王設位於兗國公顏子之次勅依

禮部上言近年禮文屢經改定而正辭錄其間尚有差誤如先農正座帝神農氏祝文云以后稷配神作主配座后稷云作主侑神謹按春秋公羊傳曰郊則曷為必祭稷王者必以其祖配王者則曷為必以其祖配自內出者無匹不行自外至者無主不止何休曰必得主人乃止者天道暗昧故推人道以接之然則古者作主配

神之意本施於祖宗其間有雖非祖宗而施祝辭可以
言作主配神者如五人帝之於五天帝是推人道以接
天神勾龍之於社后稷之於稷是推人道以接土穀之
祇其祝辭俱云作主可也若並為外祭而正配座又皆
人鬼則以正座為主其配座但合食從祭而已禮曰蜡
之祭也主先嗇而祭司嗇說者謂以先嗇從祭今儀享
先農亦是以先嗇為主以司嗇為合食而配座祝辭乃
云作主侑神於正座祝文亦曰以后稷配神作主伏緣

先農為外祭正配座均為人鬼而以司嗇主先嗇蓋自唐以來失之伏請於神農祝文云以后稷配於后稷配云配食於神如此類數十條皆刪修改正協禮意

元豐令諸私忌給假一日逮事祖父母者准此樞密安公祖妣忌方二歲時祖妣已沒疑逮事以問禮部何員外答曰禮記云生不及祖父母說者曰子生所不見又曰子生之時祖父母已死故曰生不及祖父母元豐令所逮事祖父母逮及也謂生而及見祖父母者也夫生

而及見祖父母者禮許其稅服則今令於私忌給假不
違禮意子之生未有不違母者故鄭氏以違為及識也
然則及識當以幾歲為限曰子生三月則父名之以其
三月一時天氣變有所識別故也生三月之後可謂之
及識耳事者為成人言之也成人然後知事父母之道
也

七月左丞王安禮罷以端明殿學士知江寧府范純粹
為右司員外郎以右司員外郎孫覽為河東轉運使

左僕射廳西貯廊右僕射正廳各產芝草一本繪圖以聞

禮部林郎中言昔見宋賜道說唐朝帝王帶雖犀玉然皆黑鞞五代始有紅鞞潞州明皇畫像黑鞞也其大臣亦然余昔通判滑州見州衙設廳東西有賈魏公祠堂皆黑鞞玉帶不知紅鞞起於何時也

八月膳部郎中魯有開罷為提舉亳州明道官以通判延州吳安憲為膳部員外郎

流蘇五采毛雜而垂之摯虞決疑要注曰凡下垂為蘇
張衡東京賦飛流蘇之騷殺其注云騷殺垂貌蓋流蘇
騷殺皆下垂也

宗室子漪說書於秘書省特授通直郎服緋令緋士泥
等數人應進士舉取解別試所衣白襴一時新事也

柳子厚作館驛使記云萬國之會四表之來天下之道
塗畢出於邦畿之內故館驛之制於千里之內尤望自
萬年至於渭南其蔽曰華州其闕曰潼關自華而北界

於櫟陽其蔽曰同州其關曰蒲津自灞而南至於藍田
其驛六其蔽曰商州其關曰武關自長安至於盤屋其
驛十有一其蔽曰洋州其關曰華陽自武功而西至於
好畤其驛三其蔽曰鳳翔府其關曰隴關自渭而北至
於華原其驛九其蔽曰坊州自咸陽而西至於奉天其
驛六其蔽曰汾州由四海之內總而合之以至於關由
關之內東而會之以至於王都言唐都畿之制如此雖
六典所在亦不得具詳今司門職方謂宜舉唐舊制而

復京畿之壯觀焉

九月駕部郎中祖無頗知潁州

二十一日以立冬祀黑帝祠官受誓戒於尚書省始舉
質明故事從新勅也前此四鼓初羣官皆集多宿於近
坊禮部上言以謂質也明也仍請蠲其日朝謁勅依不
准禮合經據而奉祠者免後至之彈劾焉

天下諸路文武職事官總四千一百一十八員開封府
界約五十員京東路約三百七員京西路約三百八員

河東路約二百七十員河北路約四百二十員陝西路約五百二十二員淮南路約三百五員兩浙路約三百一員江南東路約一百九十四員江南西路約一百六十四員荆湖南路約一百二十員荆湖北路約一百五十三員福建路約一百一十四員成都府路約一百五十八員梓州路約一百五十員利州路約一百四十二員夔州路約一百一十一員廣南東路約一百六十一員廣南西路約一百六十八員蓋十九路總數大約如

此幕職判司簿尉又在其外因頒降擬舉陞陟人數式
遂得見天下具員他處則無也

禮部郎中廳東直皇城其內即廣聖宮林子中云每清
旦風順聞濃香東來此宮三清閣晨炷也主客又在其
北正對後苑春夏燕鶻無數飛翥往來上林喬木之所
栖止也

起居郎楊景畧左司郎中錢勰奉使高麗七月二十四
日同自密州發洋楊起居至大洋過東風飄回登州八

月初二日再發洋十三日方至高麗境上錢左司郎八月四日已達彼國一海之中風勢如此又可異

開寶寺試國學進士景德寺又為別試所既開院以車營務驢車數十量載試卷赴禮部架閣數日方畢所落人數可知也

十月四日禮部試饒州進士朱天申年十二念周易尚書毛詩周禮禮記孝經論語孟子揚子老子凡十經各有一百通前日所試童子天錫之再從兄也亦召至睿

思殿賜五經出身

以給事中韓忠彥為禮部尚書以左司郎中錢勰為中書舍人以吏部郎中范百祿為起居郎以直集賢院滿中行為左司郎中以太常丞呂希績為吏部員外郎

世言市井市廛未曉其義如何因讀風俗通曰市亦謂之市井言人至市有鬻賣者當於井上洗濯令香潔然後闕市或曰古者二十畝為井田因井為市故云又市中空地謂之廛顏師古乃云凡言市井者市交易之處

井共汲之所總而言之也

余嘗見樞密都承旨張誠一說昔年使北國因問耶律蕭姓所起彼人云昔天皇王問大臣云自古帝王英武為誰邪其大臣對曰莫如漢高祖又問將相勲臣孰為優對以蕭何天皇王遂姓耶律氏譯云劉也其后亦錫姓蕭氏歐陽少師作五代史乃曰天皇王阿保機以其所居橫帳地名為姓

世里世里譯者謂耶律昔蕭翰為契丹大族其號阿鉢

本無姓氏李松為製姓名曰蕭翰於是姓蕭二者不知孰是也

世謂胡餅者釋名云以胡麻著之也前趙錄曰石季龍諱胡改胡餅曰麻餅今俗字增食非也齊書曰永明九年詔太廟四時薦麴起餅豈今之蒸餅邪

二十七日禮部試撫州進士黃居仁年十二誦尚書毛詩并正義禮記周禮孝經孟子老子及太玄經凡九經合七十五通又試論語大義三道文理稍通勅賜五經

出身閤門送袍笏至禮部給賜焉

太師潞公歸開封府推官趙君錫作小詩二十篇紀恩寵以送行其尤為人傳誦者有若樂人都用教坊家席上羣公換口誇內裏宣來蕉葉盞御前賜出縷金花全上纔初佳句傳中官寫得便聞天聖人含笑搜尋了依韻當時賜和篇西苑重排餞會時新篇御製降彤墀明朝上已無公事赴宴臣寮總進詩雖王建宮辭無以過此也

十一月職方員外郎黃華出知汝州以秘書省著作佐郎邢恕守職方員外郎以司門員外郎呂升卿為兵部員外郎以祕書丞陳宗古為司門郎中又以曾肇為戶部郎中

十二月司勳郎中穆珣出知潤州以彭次雲為司勳員外郎以左司員外郎路昌衡為江淮發運副使以中散大夫李之純為右司郎中

急告寧皆休假名也釋名曰急及也言切之使相逮及

也李斐漢書曰告請也言請休謁也寧安也吉曰告凶
曰寧又曰休沐漢律吏五日得一休沐言休息以洗沐
也

禮部投納試卷因國學至天下所解進士者諸科赴省
試者約六千人辭場之盛未有今日之比也

昔年有一大臣留守北京方暑至上闕因得詩句云河
上荷花何處好坐上幕客河朔人也應聲對云市中柿
子是誰甜諸官莫不為之恐悚而大臣終不見怒也

文昌雜錄卷五

欽定四庫全書

文昌雜錄卷六

宋 龐元英 撰

元豐乙丑正月以司勳員外郎彭次雲為郎中

開寶寺為禮部貢院二月十八日火凡本部貢牋與夫
所考試卷須吏灰燼畧無遺者自正月九日鑠院方定
二十八日奏號至是火詔以太學為貢院再令引試前
此未有也

元豐六年癸亥大慶殿元會初設五輅於廷除夜三更大風自北木拔幕屋壞新玉輅右輪入池數尺玉飾皆碎觀者莫不駭愕八年正月二日先帝不豫二月五日遽宣遺制方悟為變之兆也

二月二十七日内出白麻丞相而下進官一等是日麻案在宗政殿門百官素服序班於門外南北相向通事舍人宣麻於正東西向示變禮也

元豐八年春太史奏熒惑守心是時太清宮道士王太

初奏章於太一宮真室殿之中壇回云至九天門下有傳上章之命者曰已付南陵使者告行太初因敬問曰南陵使者謂誰答云見守心者是也已而又拜章於壇上回云後有傳上帝之命者云已再付南陵使者依命告行自此京師大火焚廬舍開寶寺為甚未幾宮車晏駕太初方敢傳此事於人間也余昨充壯朝賀同天節接伴使三月五日至深州安平縣前一夕大風是日寒甚雪深數尺林木多折至雄州泣覩遺制河朔人言雖

極寒暮春未嘗有此異也

度支員外郎陳向權兼京西轉運使以修奉山陵增員
也事畢如故云

四月以左司郎中范子奇為直龍圖閣河北轉運使以
右司員外郎范純粹為直龍圖閣京東轉運使以吏部
員外郎劉奉世為京西北路提點刑獄以戶部郎中劉
理為京西轉運副使以金部郎中晁端彥為利州路轉
運副使以都官郎中葉溫叟為秦鳳路提點刑獄又以

右司郎中李之純為太僕卿以吏部郎中胡宗愈為右
司郎中以工部員外郎高遵惠為左司員外郎以職方
員外郎邢恕為右司員外郎以知滑州劉摯新知信陽
張汝賢並為吏部郎中以潞州韓宗道為戶部郎中以
京西北路提點刑獄梁燾為工部郎中以知密州范諤
考功員外郎呂和卿並為金部員外郎以太常博士盛
陶為考功員外郎以秘書省校書郎葉祖合為職方員
外郎以閣門通事舍人文貽慶為都官員外郎

五月左僕射王公亮以右僕射蔡公確為左僕射以知樞密院事韓公縝為右僕射又以戶部尚書王存為兵部尚書以翰林學士曾布為戶部尚書以兵部侍郎許將為龍圖閣直學士知成都府以吏部員外郎文及為直龍圖閣直陝州以戶部郎中曾肇為吏部郎以考功員外郎王子韶水部員外郎王諤並為郎中

六月以通判潁昌府范純禮為戶部郎中以右司諫蹇序辰為司封員外郎

左僕射王公珪己未七月初九日主知樞密院韓公鎮同申月日皆同惟時差異五月十八日王公薨後數日韓公拜右僕射陰陽家之說果可信邪

余奉使至雄州五月二十二日次白溝驛是日晚雨雹其大如拳屋瓦多碎彼人云歲常如此尤有甚於此者目所未覩也

司馬公光拜門下侍郎辭避甚確累遣御藥院近侍召受告身隻日特垂簾促令告謝押赴門下歸即歸私第

又遣入內都都知張茂則宣召供職國朝故事惟宰相或間遣御藥院近臣傳旨都知累朝未嘗遣也召受告身雙日特開延和又遣都都知宣召皆非舊例恩禮之隆今昔絕擬

北人謂住坐處曰捺鉢四時皆然如春捺鉢之類是也不曉其義近者彼國中書舍人王師儒來修祭尊余充接伴使因以問師儒答云是契丹家語猶言行在也

七月以資政殿大學士呂公著為左丞自王安禮罷左

丞久闕至此方有除授

初五日詣南郊請大行皇帝尊諡曰英文烈武聖孝廟
曰神宗三省給諫侍郎已上學士待制御史中丞宗室
正任團練使寺監長寄祿中散大夫已上並預焉

七月十六日太皇太后生辰上節名曰坤成有司檢討
故事北朝當遣使人乾興元年章獻太后垂簾各遣生
辰使人亦曾致書嘉祐二年北朝國母聽政真宗之妻於仁
宗皇帝為弟婦即難通問是時每遣國信使即致書洪

基云請侍次聞達其回書亦洪基傳達母后之辭使者到彼國即洪基殿通書母后殿傳達遣使之語及致禮物當時以謂得禮今洪基英宗皇帝之弟也於太皇太后亦難通問朝廷方采用嘉祐故事無以易焉

十四日北朝祭奠弔慰使副各素服詣皇儀殿行禮既畢百官立班殿門外進召奉慰云

以戶部侍郎李定為龍圖閣直學士知青州以寶文閣待制吳雍為戶部侍郎

梁沈約有修竹彈甘蔗文具畧曰渭川長蕪淇園貞幹
臣修竹稽首言切尋姑蘇臺前甘蔗一叢宿漸雲露在
苒歲月今月某日有臺西階澤蘭萱草到園同訢自稱
今月某日巫岫歛雲秦樓開照乾光普罔幽不矚而
甘蔗攢莖布影獨見鄴敵雖處臺隅遂同幽谷臣謂偏
辭難信敢察以情登攝甘蔗左近杜若江蘺依源辨覆
兩草各處異列同款既有證據差非風聞妨賢敗政孰
過於此而不除戮憲章安用請以見事徙根翦葉斥出

臺外庶慙彼將來謝此衆屈歷觀自昔文集未嘗有類此製者雖曰新竒蓋亦有所寓託也

朝廷承五代之弊名式未正文德殿東西有上閣門而無上閣按大唐宣政殿周之中朝也是謂正衙紫宸殿直其北是謂上閣蓋自晉太極殿有東西閣天子坐以聽政閣之名起於此方唐盛時立仗於宣政天子坐紫宸而金吾殿中細仗自東西上閣門入謂之喚仗今文德殿唐宣政正衙也而垂拱直其北紫宸乃在東偏文

德殿東西但有上閣二門未審以何殿為上閣謂宜參詳典故正上閣之名以復有唐盛事焉

以知蔡州黃好謙為駕部郎中劉摯為秘書少監以都官郎中蒲宗閔為利州路轉運副使以知明州馬琬為都官郎中以左司郎中胡宗愈為起居郎以右司員外郎邢恕為起居舍人以吏部郎中張汝賢為右郎中

元豐八年七月御史臺班簿銀青光祿大夫二員光祿大夫二員正議大夫六員通議大夫九員大中大夫四

員中大夫六十員朝散大夫七十三員朝奏大夫八十
七員朝請郎一百二十一員朝散郎二百一十四員朝
奉郎二百八十四員承議郎三百六十七員奉議郎四
百八十九員通直郎二百三十五員分司官四十員宣
德郎二百三十八員宣義郎一百一十四員承事郎一
百三員承奉郎一百五十七員承務郎一百一員內外
共一千八百餘員近者登極覃恩各有遷改其多如此
然舊數亦依約可見也

史記季布傳楚人曹丘生招權顧金錢事貴人趙同等
漢書同作談司馬遷以父名故改之今人與父同名者
改曰同為是也

唐慈恩題名按劉公嘉話錄起自進士張莒於長安慈
恩寺閒遊題其姓名於塔下後書之於板遂為故事本
朝進士題名皆刻石於相國興國兩寺亦慈恩之比也

梁四公子一人姓蜀

音

揭名闔

萬禁

孫原人一人姓魏

音

名杰

音

天齊人一人姓楚

音

名嶺

音

浩澶人一人姓仇

音掌名腎五阮人昭明太子曰蜀出揚雄蜀記闔出公羊
傳觀出世本字亦作簡出三齊記杰出竹書紀年麴出
索緯隴西人物志蟻出世本及廣雅仇出太乙符腎出
史記孫原楚山名浩澶洮湟之間二水名五阮雁門也
浩音告澶音門今俗呼為閤門河蓋疾言之
告為閤耳

吏部西選一曰尚書左選京朝官三千餘員二曰尚書
右選大使臣一千九百餘員三曰侍郎左選幕職令錄

判司簿尉四千餘員四曰侍郎右選小使臣一萬三十餘員四選除非次闕外例多待闕及二年者員多闕少之弊也

唐制天子坐朝宮人引至殿上故杜甫詩云戶外昭容紫袖垂雙瞻御坐引朝儀天祐二年十二月詔曰宮妃女職本備內任今後每遇延英坐日只令小黃門祇候引從宮人不得出內自此始罷也

今三省官諫議大夫司諫正言郎中方出入重戴蓋昔

者門下中書省自侍郎常侍給舍諫議至起居遺補尚書省自尚書丞郎至正郎皆重戴是為清望官唯員外郎不得預此御史臺至今自中丞監察皆重戴獨此為是耳三省皆非故事也

周顯德六年高麗遣使獻別叙孝經一卷越五孝經新義八卷皇靈孝經一卷孝經雌圖三卷別叙者記孔子所生及弟子從學之事新義者以越王為問目釋疏文之義皇靈者止說延年避災之事及符文乃道書也雌

圖者止說日之環暈星之彗孛亦非奇書熙寧中王徽病詔醫官馬世長往治之歸得東觀漢記七冊彼亦自無完本然俗好經書至於庶賤之家各於衢路造大屋謂之局堂子弟晝夜誦讀云

建隆三年班簿計二百二十四員南班在內元豐八年止階官計二千八百餘員然建隆時兩省凡二十七人蓋不專職本務分涖中外之任焉

神皇帝靈駕發引自福寧出垂拱殿由西上閣門文德


殿端禮門出右昇龍門至德門而不由大慶殿平日輦路既葬吉仗即日東還到闕虞主自右掖門入由右長慶嘉肅銀臺承天門至集英殿奉安列聖故事也

中書舍人禮上有押角尚書八坐丞郎初拜並集都坐交禮遷又解交六典載蘊位動位皆未詳其義以俟知者

押角解交已檢獲載後篇

梁均王晉天福中始葬故妃張氏獨存考功員外商鵬

為誌文曰七月有期不見望陵之妾九疑無色空餘泣
竹之妃後唐武皇師還渭北不獲入覲幙客李龔書作
違離表云穴禽有翼聽舜樂以猶來天路無梯望堯雲
而不到五代之季工翰墨者無以過此也



文昌雜錄卷六

文昌雜錄補遺

余記中書舍人禮上押角未詳何義按唐裴坦傳載令狐綯薦坦為知制誥裴休持不可不能奪故事舍人初詣省視事四丞相送之施一榻堂上壓角而坐坦見休重愧謝休拂然曰此令狐丞相之舉休何力顧左右索肩輿出宋次道乃曰舍人上事必設紫褥於廷面北拜廳閣長立褥之東北隅謂之壓角宋丞相作掖垣叢誌亦不解其事未知何者為是

唐國子祭酒李涪作刊誤云兩省官上事日宰相臨焉
上事者設床几面南而坐判三道案宰相別施一床連
上事官南坐於四隅謂之押角自常侍已下以南為上
差牙相承實乖禮敬何不為丞相設位於衆官之南常
侍諫議給事舍人循次而坐於丞相之下尊卑有序足
以為儀由此觀之不獨中書舍人凡兩省官禮上宰相
皆壓角也至五代馮道為宰相判狀尾罷之應自此閣
長立於東北隅猶謂之押角如宋次道所記也

又五代會要晉天福五年三月勅中書門下
五品已上於兩省上事宰臣押角之禮宜廢
余又記後唐同光三年洛京積善坊得古文錢曰得一
元寶順天元寶史不載何代鑄此錢近見朝士王御儀名
家有錢氏錢譜云史思明再陷洛陽鑄得一錢賊黨以
謂得一非佳號乃改順天蓋史思明所鑄錢也

余前記尚書省初拜並集都坐交禮遷又改交未詳其
略曰漢制八坐及丞郎初拜官並集都坐交僕射八坐

也又無不答之文又東宮舊事曰太子至承華門設位拜二傳二傳交禮畢不復登車又後漢養老儀天子與五更於門屏交禮即答拜詳此並以對拜為交禮遷日又集對拜而去謂之解交也

余前記唐諫議遺補在左右省而劉禹錫送令狐博士詩云諫院過時榮棟莠已有諫院之名何哉按會要貞元中薛元興為諫議大夫奏云諫官所上封章事皆機密每進一封兩省印署凡有封奏人且先知請別鑄諫

院印庶免漏泄乃知諫院之名舊矣



文昌雜錄跋

余自壬戌五月入省至乙丑八月罷每有所聞見私用
編錄歲月寢久不覺滋多官在儀曹粗記故事今雜為
六卷名曰文昌雜錄或有謬誤覽者為校正焉南安龐
元英題

